

摘藻堂四庫全書薈要

史部

欽定四庫全書叢要卷九千三百八十二

史部

文獻通考卷六十二

鄱陽馬端臨貴與著

職官考十六

制置使

唐宣宗大中五年以白敏中充招討党項行營都統制
置等使制置使之名始此

宋朝不常置掌經畫邊鄙軍旅之事政和中熙秦用兵

以內侍童貫為之宣和末姚古為京畿輔郡兵馬制置

使靖康初种師道為河東路制置使錢蓋為陝西五路

制置使建炎元年有招捉盜賊制置使自王淵始三年

有行在五軍制置使自劉光世始又諸路皆有副使自

江浙陳彥文程千秋始六月浙西安撫使康允之帶本

路制置使安撫帶制置自此始也四年有沿江都制置

使管江南東路紹興二年有沿海制置使係建康兩浙東路三

年有安撫制置使大使之名自江南西路大使趙鼎始六年始鑄印以某

路制置司為名從浙西淮東制置使梁汝嘉所請也其

後盡省惟四川沿海有焉

四川係成都府沿海明州

開禧用兵起丘

宗卿守金陵留鑰宗卿嘗以簽樞督視軍馬於是趙淳
已為江淮制置命宗卿為江淮制置大使已而罷四川
宣撫又以安子文為制置大使朝議以子文恩數視執
政特加大字屬官有參謀參議主管機宜書寫文字各
一員幹辦公事三員準備將領差遣差使各五員餘隨
時勢輕重而增損焉

經畧使

唐貞觀二年邊州別置經畧使此蓋使名之起節度兼度支營田招討經畧使則有副使判官各一人儀鳳二年以黑齒常之為河源軍經畧大使永淳元年婁師德為河源軍經畧副使至德三年賀蘭進明除嶺南五府經畧兼節度使建中元年除元琇節度始不合五府經畧

宋朝不常置咸平五年始以右僕射張齊賢為邠寧環

慶涇原路經畧使判汾州諸路軍馬並受節度又以鄧

州觀察使錢若水為并代經畧使判并州自後不除人

寶元中夏人入寇始命陝西沿邊大將皆兼經畧皇祐

間懷智高擾邊詔知廣桂州並帶經畧安撫使自後西

南二邊常帶經畧所以重帥權而服羌夷也其經畧安

撫各以直祕閣以上充掌一路兵民之事皆帥其屬而

聽其獄訟頒其禁令定其賞罰稽其錢穀甲械出納之

名籍而行以法若事難專決則具可否稟奏即干機速

邊防及士卒抵罪則聽以便宜裁斷帥臣任河東陝西
嶺南路職任綏御戎夷則為經畧安撫使南渡之初依
舊制廣南東路帶主管經畧安撫使公事西路帶經畧
安撫使紹興五年令襄陽守臣湖北帥帶經畧安撫使
中書門下省言湖北帥司已移還荆南舊治與襄陽府事體頗同詔王庶許依襄陽例帶經畧安撫後罷
而二廣如故

發運使

宋太平興國二年置江淮水陸發運於京師端拱元年

罷以其事分隸排岸司至道元年始命洛苑副使楊允恭西京作坊使副李延遂及太子中允王子與為江淮南兩浙發運使兼知制茶鹽事就淮南置局三年省咸平二年鹽鐵判官王子與復為制置淮南茶鹽是年令兼制置礬稅仍領荆湖路三年以子與充淮南轉運使四年又加都大發運事兼以淮南轉運使領其務而無使名景德二年復置一人後亦有二人副使以諸司副使充景德二年置都監天禧二年官崇者或為副使秩

輕者為都監副使都監不常備景祐元年罷寶元元年復慶歷七年上命發運副使更不置正使置司真州歲漕江湖粟六百萬斛以贍中都渡江後江湖寇盜多發運司第職糴買而已紹興二年罷以其錢帛赴行在八年起居舍人勾龍如淵言戶部非生財之道請置諸路水陸度支轉運等使置司蘇杭戶部侍郎李彌遜請復置發運使別給糴本錢數百萬緡廣行儲積徽猷閣待制程邁為江湖荆浙閩廣經制發運使專掌糴事九年

廢發運司乾道六年虞丞相當國奏復發運司以戶部侍郎史正志為江浙荆湖淮廣福建等路都大發運使朝論不以為宜汪聖錫黃通老二尚書言之尤力執政不聽其年十二月正志以奏課誕謾遂廢司焉後復置以平江府守臣兼專領糴運之事以餉淮軍

總領

總領財賦古無其官宋靖康末高宗以大元帥駐軍濟州命隨軍轉運使梁揚祖總領措置財用然未以官名

也南渡初嘗命朝臣總領都督府宣撫司財賦建炎末
張浚用趙開總領四川財賦始置所繫銜總領官自此
始紹興三年差戶部侍郎姚舜明往建康總領應干都
督府錢物糧斛六年都督諸路軍馬張浚言三宣撫司
錢糧漕司互相占愆因至闕乏乞於戶部長貳內差一
員來鎮江府置司專一總領詔差戶部侍郎劉寧止七
年令戶部郎官霍蠡前往岳州置局專一總領岳飛軍
錢糧其後大軍在江上間遣版曹或太府司農卿少調

其錢糧皆暫以總領為名而四川改置都轉運司故總領又廢紹興十一年諸將既罷兵乃收諸帥之兵以為御前軍屯駐諸處皆置總領以朝臣為之仍帶專一報發御前軍馬文字蓋又使之與間軍政不獨職餽餉而已叙位在轉運副使之上鎮江諸軍錢糧淮東總領掌之建康池州諸軍錢糧淮西總領掌之鄂州荆南江南諸軍錢糧湖廣總領掌之興元興州金州諸軍錢糧四川總領掌之初以胡紉為司農少卿總領淮東軍馬錢

糧吳彥璋為太府少卿總領淮西江東軍馬錢糧曾造

為太府卿總領湖廣江西京西路財賦湖北京西軍馬

錢糧諸軍不聽節制十六年四川總司以總領四川宣

撫司錢糧所為名十八年詔罷宣撫司始改為四川總

領孝宗乾道六年詔淮東總領併歸淮西總領所

中書門下

省言勘會淮東總領所廢併司名合行併司詔以總領

兩淮浙西江東財賦軍馬錢糧為名仍鑄印繳納兩司

元印七年復置淮東總領官屬有幹辦公事差遣四川有

主管文字二員淮東西有分差糧料院審計司

審計司通判兼

擁貨務都茶場御前封樁甲仗庫大軍倉大軍庫贍軍
酒庫市易抵當司惠民藥局湖廣有給納場分差糧料
院四川有撥發船運官贖藥庫糴買場餘並同兩淮

都大提舉茶馬

宋熙寧七年始三司鹽鐵判官李杞三司勾當公事蒲
宗閔經畫川蜀買茶充秦鳳熙河路博馬就除提舉成
都府路買茶公事杞於秦川宗閔於成都置司後改名
都大提舉茶馬事熙寧七年差李杞蒲宗閔成都府買

茶熙河路博馬並令杞等提舉置都大提舉及主管同
主管各因其資品高下除授云元豐四年羣牧判官郭
茂恂又言茶司既不兼買馬遂立法以害馬政恐誤國
事乞併茶場買馬為一司從之蓋茶馬司始合於此時
也舊制於源渭德順三郡市蕃馬熙寧七年初復熙河
經畧使王韶言西人頗以善馬至邊其所當唯乏茶
與之為市請趣茶馬辨之乃命三司內當公事李杞運
蜀茶至熙河置買馬場云而源渭德順更不買馬於是
杞言賣茶市馬一事也乞同提舉買馬杞遂兼馬政然
合分不常至元豐四年羣牧判官提舉買馬郭茂恂又
言茶司既不兼買馬遂立法掌收摘山之利以佐邦用
以害馬政乞併為一司從之

凡市馬於蕃夷以茶易之大觀以來茶馬之政廢川茶

不以博馬唯市珠玉故馬政廢缺

建炎四年張浚奏大石進奉珠玉高宗俞

曰云

紹興四年從闕師古之請以乏戰馬始令四川宣

撫司支茶博馬五年密院言已於永康軍威茂州置場

七年宰臣趙鼎言得旨復置茶馬官舊有主管茶馬同

提舉茶馬都大提舉茶馬凡三等上曰考其資歷命之

乾道元年川秦兩司馬額共九千餘匹

茶馬陳彌作言本司買馬川秦

兩司文黎珍叙南平長寧軍本州軍年額川馬五千餘匹係應副江上諸軍階州之峯帖陝西和州之宕昌兩

處年額共西馬四千餘匹係輪年應副三衙

川秦兩司者祖宗舊制至今不

廢

四年四川宣撫司虞允文奏照得祖宗朝都大茶馬官於秦州成都各置司居治各半府排發馬月分居

秦司訖事即歸川司措置發茶并買馬物帛之類今欲依舊制於鳳州河池縣置秦司既近宕昌買馬之弊可

以稽察從之

秦馬舊二萬匹乾道川秦買馬之額歲為萬有

一千九百匹有奇川司六千秦司五千九百益梓利三

路漕司歲應副博馬紬絹十萬四千匹成都利州路十

一州產茶二千一百二萬斤茶馬司所收大較若此其

後文州改隸秦司而川司增珍州之額共為四千八百

九十六秦司六千一百二十合兩司為萬有一千十有六匹此慶元之額也嘉泰末川司五場又增為五千一百九十六匹秦司三場增為七千七百九十八匹合兩司為萬有二千九百九十四匹然累歲所市多不及額焉

都大坑冶

唐開元二十五年監察御史羅文信充諸道鑄錢使天寶三載楊春矜除御史中丞充鑄錢使六載度支郎中

楊釗充諸道鑄錢使永泰元年劉晏充東都淮南浙江
東西湖南山南東道鑄錢使第五琦充京畿關內河東
劍南山南西道鑄錢使諸鑄錢監監所在州府都督刺
史為之副監一人上佐判之

宋朝自開寶平吳之後因其舊置錢監於鄱陽既而江
淮荆浙閩廣之地皆有監係發運使兼提點咸平三年
以馮亮為江南轉運副使兼都大提點江南福建路鑄
錢事內供奉官白承睿同提點鑄錢事至景祐二年始

置江浙川廣福建等路都大提點坑冶鑄錢一員以魏

兼為之與提點刑獄序官

按四朝傳榮宗範知鉛山縣有詔罷民采銅皆散為盜宗

範一切始如故真宗嘉異擢提點江浙諸路銀銅坑冶與此不同當考

元豐二年三司言

江浙等路提點坑冶鑄錢官一員通領九路水陸巡按

不周欲增一員分路提點從之遂定為兩司在饒者領

江東淮浙七閩在虔者領江西荆湖二廣焉至元祐元

年以坑冶鑄錢通為一司從淮南提點李深之請也政

和七年置提點鑄錢官兩員於饒虔州紹興二年置虔

州提點司從提點王喚之請也

雖有上項指揮後來多在饒州置司贛州只係

巡歷六年趙伯瑜乞依嘉祐著令銜內添都大二字與提

刑序官二十六年詔都大提點坑冶鑄錢司官吏並罷

令逐路轉運司交割

以尚書省言坑冶鑄錢司近年鑄錢全虧一司官吏所費不貲罷之

二十七年置提領諸路鑄錢官於行在差侍從或卿監

一員不妨本職兼領置屬官三員以提領諸路鑄錢所

為名以戶部侍郎榮巖兼二十九年從左司諫何溥言

乃復置以江淮荆浙福建廣南路提點坑冶鑄錢公事

繫銜與運判序官依舊於饒贛二州置司輪年守任專

以措置坑冶督責鼓鑄為職

租額一百六十餘萬貫

孝宗乾道六

年併歸發運司八年復置

此據提點司題名

八年詔鑄錢司依

舊置提點官二員於饒贛二州置司

除王楫李大正二人

九年兩

司分認課額

將江南淮南兩浙潼州利州路隸饒州司

所有舊坑多係江西却慮饒州一司無從措置欲於江西管内取撥江州吉州撫州興國軍隆興府却隸饒州

司從

淳熙三年併贛司歸饒州王楫專為提點官加都

大馬屬官有幹辦公事一員檢踏官三員催綱官一員

後檢踏增置六員各分認專管職事

一員饒州本司一員信州一員建州

一員都州

一員潭州

提舉市舶

唐有市舶使以右威衛中郎將周澤為之

見柳澤劾慶立疏

唐

代宗廣德元年有廣州市舶使呂太一

宋開寶四年下廣南以同知廣州潘美尹宗珂並兼市舶使通判謝處玘兼市舶判官咸平二年九月庚子令杭州明州各置市舶聽蕃官從便熙寧中始變市舶法

泉人賈海外者往復必使東詣廣否則沒其貨海道回

遠竊還家者過半歲抵罪者衆太守陳侂奏疏願置市

舶於泉不報哲宗即位之二年始詔泉置市舶

侂子齊之父也

侂傳廷平志

蕃制雖有市舶司多州郡兼領元豐中始令轉

運司兼提舉而州郡不復預矣

三年尚書省言廣州市舶條已修定乞專委官

惟行詔廣東以轉運使孫迥廣西以運召陳伯雨浙以

轉運副使周直孺福建以轉運判官王子京迥直孺兼

提舉惟行倩子京兼覺察拘欄

其廣東路安撫使更不帶市舶後專置提舉而轉運亦

不復預矣後盡罷提舉官至大觀元年續置明年御史

中丞石公弼請歸之轉運司不報建炎中興詔罷兩浙
福建市舶司歸轉運司明年夏復閩浙二司賜度牒直

三十萬緡為博易本

元年十一月廢
二年五月復

四年春復置廣司

尚書省言併廢以來工人不便
虧失數多於是詔依舊復置

紹興二年廢福建提舉

市舶初令提刑兼領旋委提舉茶事十二年朝廷欲措

置福建蠟茶

時欲發蠟茶至
行在置局出賣

呂斌上言於是茶事司歸

建州而提舉市舶以次復矣十四年命蕃商以香藥至
者十取其四十七年詔丁沉香豆蔻龍腦之屬號細香

藥者十取其一乾道二年詔罷兩浙提舉市舶逐處職
事委知通知縣監官同行檢視而總其數令轉運司提
督紹興十九年張閩言福建廣南各置務於一州兩浙
船務乃分建於五所至乾道初臣僚言兩浙惟臨安
明州秀州温州江陰軍凡五處有市舶祖宗舊制有市
舶處知州兼提舉市舶務通判帶主管知縣帶監而逐
務又各有監官市舶置司乃在華亭近年過明州船舶
到提舉帶一司吏人留明州數月名為抽解其實擾
且福建廣南皆有市舶物貨浩瀚置官提舉誠所
當宜惟是兩浙置官委是冗蠹乞賜廢罷從之

走馬承受

兼訪使

走馬承受諸路各一員宋仁宗時置以三班使臣及內

侍充隸經畧安撫總管司無事歲一入奏有邊警則不時馳驛上聞然居是職者惡有所隸乃潛去總管司字冀以擅權熙寧五年帝命正其名鑄銅記給之仍收還所用奉使印崇寧中始詔不隸帥司而輒預邊事則論以違制大觀中詔許風聞言事政和五年詔諸路走馬承受體均使華適來皆貪賄賂類不舉職是豈設官之意其各自勵以稱任使或蹈前失罰不汝赦明年七月改為兼訪使者宣和五年詔近者諸路兼訪官循習違

越附下周上凡邊機皆先申後奏且侵監司凌州縣而
預軍旅刑獄之事復強買民物不償其直招權恃勢至
與監司表裏為惡自今猶爾必加貶竄靖康初罷之依
祖宗舊制復為走馬承受

經制邊防財用事

掌經畫錢帛芻糧以供邊費凡權易貨物根括耕地及
蕃部弓箭手等事皆奏而行之熙寧末以熙河連歲用
兵仰給度支費不貲始置是司元祐初罷崇寧中復置

提舉學事司

掌一路州縣學政歲巡所部以察師儒之優劣生員之勤惰而專舉刺之事宗寧年置宣和三年罷

提舉河北糴使司

掌糴便芻糧以供邊儲之用

提舉制置解鹽司

掌鹽澤之禁令使民入粟塞下予鈔給鹽以足民用而實邊備凡鹽價高下及文鈔出納多寡之數皆掌之

提舉保甲司

掌什伍其民教之武藝視其優者而進賞之元豐初置於開封府界遂下其法於河北河東陝西三路既而悉置提舉官如府界焉

提舉三白渠公事

掌潞沁三白渠以給關中灌溉之利撥發司輦運司以時起發綱運而督其滯留以供京師之用

提舉弓箭手

掌沿邊郡縣射地弓箭手之籍及團結訓練賞罰之事
政和五年復置以所招弓箭手之數為殿最

元祐初右僕射司馬光乞罷提舉官疏曰天聖中諸
路止有轉運使一員亦無提點刑獄惟河北陝西以
地重事多置轉運使兩員一路之事無不總使按察
官吏進賢發姦興利除害或朝廷有本路事務未能
細知利害者則委之相度措置當時官少民安事無
不舉公私饒樂海內晏清景祐初始復置提點刑獄

其後或時置轉運判官以其冗長害事尋復廢罷自王安石執政以來欲力成新法諸路始置提舉常平廣惠農田水利官其後各置提舉官皆得按察官吏事權一如監司又增轉運副使判官等員數皆選年少資淺輕俊之士為之或通判知縣監當資序及選人以權發遣處之有未嘗歷親民即為監司者能順己意即不次遷擢小有乖違則送審官院與合入差遣更加責降彼年少則歷事未多資淺則衆所不服

輕俊則舉措率易又利祿誘於前罪戾怵於後由是
往往上不顧國家事體下不恤百姓怨咨止務希合
以廣進取致今日天下藉藉如此皆由此來則提舉
官乃病民之本原也

經總制使

徽宗宣和三年方臘初平江浙諸郡皆未有常賦乃詔
除陳亨伯以大漕之職經制七路財賦許得移用監司
聽其按察於是亨伯收民間印契及鬻糟醋之類為錢

凡七色是後州縣有所謂經制錢自亨伯始也其後翁
端朝繼為之紹興初與發運俱罷九年復置以戶部侍
郎梁汝嘉為使司農少卿霍蠡為判官以檢察内外失
陷錢物舉催未到綱運措置糴買總領常平為職未幾
諫議曹統言其無益而多費就省之紹興中又有總制
司以參政孟庾領其事其職畧視經制司

招討使

掌招收討殺盜賊之事不常置建炎四年以檢校少保

定江招慶軍節度使張俊充江南路招討使定位在宣撫使之下制置使之上著為定制軍中急速事宜待報不及許以便宜行事差隨軍轉運使一員參講官一員幹辦官三員隨軍幹辦官四員書寫機宜文字一員并聽奏辟紹興五年岳飛為湖北襄陽招討請州縣不法害民者許一面對移或放罷以間從之十二年兀朮犯三京以韓世忠岳飛張俊並兼河南北招討使以禦之三十一一年陝西河東北京東西等路皆置招討使蓋又

特遙領其地而已

招撫使

不常置建炎初李綱秉政以張所為河北招撫使未及
出師而廢三十二年孝宗即位以成閔張子蓋李顯忠
三大將為湖北京西淮東西招撫使子蓋死劉寶代之
未幾結局官吏並罷開禧二年山東及京東西北路並
置使招撫後皆罷

宣諭使

掌宣諭德音不預他事歸即結罷紹興元年詔祕書少
監傅崧年充淮南東路宣諭使此其始也二年分遣御
史五人宣諭東南諸路戒其興獄責其不當督捕盜賊
皆欲專一布惠以為民其後右司范直方宣諭川陝察
院方庭實宣諭三京均此意及新復陝西樓炤以簽書
樞密院事往永興宣諭就令招撫盜賊鄭剛中為川陝
宣諭使許按察官吏汪徹為湖北京西宣諭使仍節制
兩路軍馬自是使權益重而使事始不專三十二年虞

允文王之望相繼充川陝宣諭使皆預軍政其權任殆
亞於宣撫其後錢端禮吳芾皆以侍從出膺斯寄事畢
結局官屬軍兵視其所任事之輕重為賞之厚薄焉開
禧間薛叔似鄧友龍吳獵皆因飢荒盜賊及平逆亂後
往敷德意亦皆以從官行

撫諭使

掌慰安存問採民之利病條奏而罷行之亦不常置建
炎元年上半年謂輔臣曰京城士庶自金人退師人情未安

可差官撫諭於是以路允迪耿延禧為京城撫諭使此
置使初意也是年八月又令學士院降詔且命江端友
等奉詔撫諭諸路其後李正民以中書舍人為江浙湖
南撫諭使且令按察官吏伸民冤抑傳崧卿以吏部侍
郎為淮東撫諭使採訪民間利病及措置營田等事或
不以使名則稱撫諭官所至以臬州撫諭司為名具宣
恩言俾民知德意初無二致乾道元年知閤門事龍大
淵差充兩淮撫諭軍馬回日結局是又特為軍馬出云

鎮撫使

舊所無有中興假權宜以招收羣盜初建炎四年范宗尹參知政事議羣盜併力以拒官軍莫若析地以處之盜有所歸則可漸制乃請稍復藩鎮之制是年五月宗尹為右僕射於是請以淮南京東西湖南北諸路並分為鎮除茶鹽之利仍歸朝廷置官提舉外他監司並罷上供財賦權免三年餘聽帥臣移用更不從朝廷應副軍興聽從便宜時劇盜李成在舒蘄桑仲在襄鄧郭仲

威在維揚許慶在高郵皆即以為鎮撫使其餘或以處
歸朝之人分畫不一許以能捍禦外寇顯立大功特與
世襲官屬有參議官書寫機宜文字各一員幹公事二
員並聽奏辟後諸鎮或以戰死或降偽齊久之但餘荆
南解潛及趙鼎為相召潛主管馬軍遂罷弗置焉

按古者牧伯之任後世之所謂監司也隋以前多
謂之刺史自唐以刺史名知州而後牧伯始別有
以名其官蓋唐之初止有上中下都督府其後則

有節度觀察團練諸使宋之初止有轉運使其後則有安撫提刑等官然唐宋中世以後監司尤多蓋唐之多設監司也起於開元天寶之興利如楊國忠為宰相所領四十餘使及元道州言到官未五十日諸使徵求符牒二百餘封是也宋之多設監司也起於熙寧元豐之行新法如蘇公所謂使者四十餘輩事少員多人輕權重及溫公所謂提舉司乃病民之本源是也又有倥偬之際因事置

官事已遂廢者前輩所著職官之書多所不載今以會要及史志參考列唐營田度支兩稅租庸等使於都督節度觀察之後列宋諸項提舉錢總制招討諸使於轉運安撫提刑等官之後庶可以備見當時設官廢置之本末云

總論州佐

別駕

治中

主簿

功曹書佐

部

郡國從事

典郡書佐

祭酒從事

中正

簽判

書記支使

推判官

州之佐吏漢有別駕治中主簿功曹書佐簿曹

簿曹從事史主

錢穀簿書

兵曹

兵曹從事史有軍事則置之以主兵馬

部郡國從事史典郡書

佐等官

又有孝經師主監試經月令師主時節祠祀律令師主平法律

皆州自辟除通

為百石

又後漢書或云秩六百石

職與司隸官屬同唯無都官從事

漢魏之際復增祭酒文學從事員晉又有武猛從事員

其州邊遠有山險砦賊

音置弓馬從事五十人歷代職員互相因襲雖小有更

易而大抵不異自魏晉以後刺史多帶將軍開府則州

與府各置寮屬州官理民

別駕治中以下是

府官理戎

長史司馬等官

是後魏舊以州牧親入班九條之制使前政選吏以待

後人獻文帝革制刺史守宰到官之日仰自舉擇以為
選官若簡任失所以罔上論自孝明孝昌以後四方多
難刺史太守皆為當部都督雖無兵事皆立寮佐頗為
煩擾高隆之乃表謂自非邊要見有兵馬者悉皆斷之
北齊上上州刺史屬官佐吏合三百九十三人以下州
遞減十人其州郡佐吏皆州府辟除及後主失政賜諸
佞幸賣官分州郡下逮鄉官多降中旨故有勅用州主
簿郡功曹者後周刺史府官則命於天朝州吏並牧守

自置至隋以州為郡無復軍府則州府之吏變為郡官

矣唐無州府之名而有採訪使及節度使

節度使說在都督篇

採

訪使有判官二人

分判尚書六行事及州縣簿書

支使二人

分使出入職如節度

使之隨車

推官一人

推鞠獄訟

皆使自辟召然後上聞其未奉報

者稱攝

其節度防禦等使寮佐辟奏之例亦如之

今舉州之舊職以列於左

舊職謂隋以前官職

別駕從事史一人從刺史行部別乘傳車故謂之別駕

漢制也歷代皆有

後漢周景為荊河州辟陳蕃為別駕蕃不受景題別駕輿曰陳仲舉座不

復更辟蕃惶恐起視職烈士傳曰孔恂字巨卿為別駕
別駕車舊有屏星如刺史車刺史因怒欲去別駕車屏
星恂曰徹去屏星毀國舊儀別駕可去屏星不可省乃
止庾亮集答郭豫書云別駕舊與刺史別乘同流宣王
化於萬里其任居刺史之半梁時別駕官
品揚州視黃門郎南徐州視散騎常侍
隋及唐並為
郡官

治中從事史一人居中治事主衆曹文書漢制也歷代
皆有隋為郡官唐改為司馬說在佐後

主簿一人錄門下衆事省署文書漢制也歷代至隋皆
有

功曹書佐一人主選用漢制也其司隸功曹從事史兼

錄衆事

應劭漢百官表曰司隸功曹從事即州治中從事也

晉以來改功曹為西

曹書佐宋有別駕西曹主吏及選舉即漢功曹書佐也

部郡國從事史每郡國各一人漢制也主督促文書舉

非法

後漢喬元字公祖為梁縣功曹荊河州刺史周景行部到梁國元謁景因伏地言陳相羊昌罪惡乞

為部郡從事窮理其罪景壯元意即署遣之元到具考
賊罪梁冀馳檄救之景承旨召元還檄至不發按之益
急昌坐檻車徵元由是著名又朱震字伯厚為州從事
奏濟陰太守單匡贓罪三府諺曰車如雞棲馬如狗疾

惡如風

朱伯厚

典郡書佐每郡國各一人漢制也各主一郡文書以郡吏補歲滿一更

祭酒從事史漢魏以來置宋世分掌諸曹兵賊倉戶水鎧之事自江左揚州無祭酒而以主簿治事

中正陳勝為楚王以朱房為中正而不言職事兩漢無聞魏司空陳羣以天臺選用不盡人才擇州之才優有昭鑒者除為中正自拔人才銓定九品州郡皆置吳有大公平亦其任也

吳習溫為荊州大公平大公平即州都也後潘秘為尚書僕射代溫為公

平甚得州里之稱

晉宣帝加置大中正故有大小中正其用人

甚重

晉劉毅字仲雄年七十已告老後舉為青州大中正尚書以毅懸車致仕不宜勞以碎務孫尹表曰

司徒魏舒司隸嚴詢與毅年齒相近管四十萬戶州兼董司百僚總攝機要議者不以為劇毅志氣聰明一州品第不足勞其思慮毅遂為州都銓正人流清濁區別其所彈貶自親貴始又干寶稱晉宣帝除九品置大中正晉令曰大小中正為內官者聽月三會議上於東門外設幔陳席又劉毅上表刺史初臨州大中正選州里才業高者兼主簿從事迎刺史若吏部選用猶下中正問人事所在父祖位狀又晉起居注曰僕射諸葛恢啓稱州部大中正為吏部尚書及郎司徒左長史掾屬皆為中正臣令領吏部請解大中正以為都中正職局司理不宜兼也

齊梁亦重焉

梁沈約遷侍中光祿大夫領太子詹事揚州大中正開尚書八條事

後魏有之

李文云中正之任必須得才業兼資者太武帝時崔浩為冀州中正

北齊郡縣

皆有其本州中正以京官為之

乾明中邢劼為中書監同郡許惇與劼競本州

中正遂憑附宋欽道出劼為刺史

隋有州都其任亦重

晉王廣為雍州牧司空揚雄太

僕高頴並為州都

唐無

容齋洪氏隨筆曰唐世士人初登科或未仕者多

以從諸藩府辟置為重觀韓文公送石洪溫造二

處士赴河陽幕序可見禮節然其職甚勞苦故亦

或不屑為之杜子美從劍南節度嚴武辟為參謀

作詩二十韻呈嚴公云胡為來幕下只合在舟中
束縛酬知己蹉跎效小忠周防期稍稍太簡遂忽
忽曉入朱扉啓昏歸畫角終不成尋別業未敢息
微躬會希全物色時放倚梧桐而其題曰遣悶可
知矣韓文公從徐州張建封辟為推官有書上張
公云受牒之明日使院小吏持故事節目十餘事
來其中不可者自九月至二月皆晨入夜歸非有
疾病事故輒不許出若此者非愈之所能也若寬

假之使不失其性寅而入盡辰而退申而入終酉而退率以為常亦不廢事苟如此則死於執事之門無悔杜韓之旨大畧相似云

又曰唐世節度觀察諸使辟置僚佐以至州郡差掾屬牒語皆用四六大畧如誥詞李商隱樊南甲乙集顧雲編彙羅隱湘南雜彙皆有之故韓文公送石洪赴河陽幕府序云撰書辭具馬幣李肇國史補載崖州差故相韋執誼攝軍事衙推亦有其

文非若今時只以吏牘行遣也

簽判唐制節度觀察判官

宋有兩使防團軍事推判官皆以選人充太平興國中
以贊善大夫十五員充諸州節度判官以王化基韋亶
武元穎等為之蓋太宗以諸州戎幕缺官選朝士補之
俾分理事且試其才此簽判所由始也蓋選人則為判
官京官則為簽判掌裨贊郡政總理諸案文移斟酌可
否以白於其長而罷行之凡員數多寡視郡小大及職

務之繁簡初政和改簽書判官廳公事為司錄建炎初復舊凡節度推判官從軍額察推及支使從州府名凡諸州減罷通判處則陞判官為簽判以兼之小郡推判官不並置或以判官兼司法或以推官兼支使亦有併判官窠闕省罷則令錄參兼管凡要郡簽判及推官皆掌除爵吏部使改二廣間許監司辟差

紹熙元年臣僚言廣西奏擬簽

判多恩科廕老乞行下轉運司不許差年六十以上昏眊之人嘉定二年臣僚言監司有幹官州郡有職官以供簽廳之職或非才不勝任則按刺易置可也今乃差兼簽廳音動輒三兩員或四五員其為冗費與添差何

異乞將諸州郡所差兼
簽廳官並行住罷從之

書記支使自魏以來有其名

魏太祖以陳琳阮瑀為司空軍謀祭酒管書記室宋

江夏王恭取邱巨源為掌書記

陳有文房書記之任

南史趙知禮蔡景歷屬陳武帝經論

之唐景龍中元帥府置掌書記一人節度使亦置焉掌

朝覲聘問慰薦祭祀祈祝之文與號令升納之事後唐

長興中有書記支使

宋朝乾德二年詔歷兩任有文學者許兩使留後奏充

掌書記

詔曰管記之任資序頗優自前藩鎮薦人多自初官除授自今歷職兩任以上有文學即許節

度使觀察使
留後奏充

太平興國六年詔諸節度州依舊置觀察

支使一員

資考俸科並同掌書記自今吏部除擬以經學及諸色人任無出身人充

凡書記

支使不得並置有出身曰書記無出身曰支使位在判官之下推官之上

推判官唐天寶後有判官之名

未見品秩

後唐長興二年詔

有兩使判官防團推官軍事判官等是時判官多本州自辟舉清泰中始擇朝士為之

宋朝沿五代之制兩使置判官推官各一人餘州置推

判官各一人

元祐令京府判官至軍監判官為幕職官皆從八品

政和初自判官


至諸曹改為士戶議兵刑工曹掾建炎復舊制焉

按州之名起於虞十有二州後世刺史之所治是也郡之名起於秦三十六郡後世太守之所治是也隋廢郡以州統縣然郡卒不可廢也至唐而復之然唐太守俱稱刺史使持節蓋所治者太守之事而所稱則州牧之官矣故所謂治中別駕之屬其在歷代本州之佐官也唐郡守稱刺史而遂以

治中別駕為郡官屬矣然唐州牧之官為節度觀察諸使而其屬官則有推官判官書記支使之屬至宋而節度觀察特為貴官之虛名初不預方岳之事而州牧之任則自有閫帥漕憲等官而各臺又自有掾屬若唐節度觀察之屬官則反為列郡之元僚蓋雖冒以節度推官觀察推官判官書記支使等名而實則郡僚耳故叙其職於州佐之後而不並之於戶曹理掾之流存其舊也



文獻通考卷六十二



總校官庶吉士臣張能照

校對官檢討臣郭寅

謄錄監生臣藍嘉瑄

欽定四庫全書叢要

史部

文獻通考卷六十三

詳校官員外郎臣潘紹觀



欽定四庫全書叢要卷九千三百八十三

史部

文獻通考卷六十三

鄱陽馬端臨貴與著

職官考十七

京尹 三輔 河南尹

周官有內史秦因之掌治京師漢景帝二年分置左右

內史武帝太初元年更名右內史為京兆尹 絕高曰京十億曰兆

大衆所聚 故名左內史為左馮翊 馮翊輔翊 初秦官有主

爵中尉掌列侯漢景帝中元六年更名都尉武帝太初

元年更名右扶風

扶助風化也

與左馮翊京兆尹是為三輔

治長安城中

三輔黃圖曰長安以東為京兆長陵以北為左馮翊渭城以西為右扶風皆治在城

中故趙廣漢歟曰亂吾治者三輔也誠得兼之直差異耳

銀章青綬進賢兩梁冠絳

朝服佩水蒼玉秩異凡州所監郡為京師置尹一人丞

一人

王尊王章王駿並為京尹皆有名京師稱曰前有趙張後有三王

漢初三輔治長

安後漢都雒陽置河南尹以三輔陵廟所在不改其號

但減其秩與太守同

後漢延篤字叔固及邊鳳皆為京兆尹並有雄名語曰前有趙張後

有邊延趙張謂
趙廣漢及張敞

後漢左馮翊右扶風屬司隸等省魏晉

為京兆太守至後周都關中又為京兆郡隋京兆郡置
尹并佐吏合二百四十四人唐京兆府本為雍州置牧
一人以親王為之太宗為秦王中宗為周王睿宗為相
王時並居其任多以長史理人開元元年改雍州為京
兆府置牧如故掌宣風導俗肅清所部或以親王居閤
而遙領焉初雍州置別駕以貳牧之事永徽中改別駕
為長史開元初改雍州長史為京兆尹總理眾務凡前

代帝王所都皆曰尹

南朝曰丹陽尹後魏初曰代尹東魏曰魏尹齊曰清都尹

河南尹其地在周為王城成王命君陳分正東郊成周

曰尹茲東郊

蓋唐河南牧之任亦留守之始

秦兼天下置三川守

三川河洛

伊也秦末李由為三川守

漢興更名三川為河南後增守為太守王

莽改太守為大尹改河南大尹為保忠信卿光武中興

徙都洛陽改太守為尹章綬服秩與京兆同主京都特

奉朝請

李膺為河南尹

魏晉皆為河南尹後魏太和中遷都洛

陽又置河南尹東魏置洛州刺史後周置洛州總管尋

罷之隋初為洛州刺史復為河南內史至大業初為荊
河州刺史又為河南太守尋為河南尹與京兆同唐武

德四年置洛州都督貞觀十七年改為刺史顯慶二年
置東郡改刺史為長史而洛州本置牧一人以親王為

之中宗為周王時及衛王重俊實居其任多以長史理
人至開元元年改洛州為河南府改長史為尹其牧尹

之制一如京兆

諸曹僚佐亦如之

各有少尹二員通判府事

京兆

少尹魏晉以來治中之任隋文帝改為司馬煬帝又改
為贊治後又改為丞武德初復為治中永徽元年以太

皇帝諱改為司馬本一員太極元年雍洛二州各開元
加司馬一員分為左右開元元年並改為少尹

以後增置太原府為北京官屬制置悉同兩京

初武太
后長壽

元年以并州后之故里改為北都神龍初廢開元十一年又以并州高祖起義之始復置太原府號曰北京初開元元年正月於蒲州置中都改州為河中府至六月而罷後上元元年復置岐州為鳳翔府又以益州為成都五代都汴為開封尹

宋朝牧尹不常置太宗真宗皆嘗尹京後親王無繼者權知府一人以待制以上充掌正畿甸之事中都之獄訟皆受而聽焉小事則裁決大事則稟奏若承旨已斷

者刑部御史臺無輒糾察典司轂下建隆以來為要劇
之任崇寧三年蔡京乞罷權知府置牧尹各一員專總

府事牧以皇子領尹以文臣充

四朝志尹以親王為之
號判南衙凡命知府必

帝權字以翰林為之翰林學士及雜學士若待制則權
發遣而已以河南府為西京應天府為南京大名府為
北京皆置留守崇寧中蔡京奏京畿四輔置輔郡屏衛
京師以潁昌府為南輔襄邑縣升為拱州為東輔鄭州
為西輔澶州為北輔知州
兼都總依三路帥臣法 中興駐驛杭州建炎三年改

杭州為臨安府守臣帶浙西安撫多卿監從臣兼紹興
三年詔臨安府有奏稟事許不隔班上殿乾道七年皇

太子領臨安府尹就東宮為解廢臨安府通判簽判職
官置少尹判官推官少尹依淳化判官例差侍從以上
判官依天聖令用郎官以上餘曹掾依舊府官庭參仍
拜小事少尹裁決徒流以上悉按判准表奏則係皇太
子銜申中書以下文移則少尹簽書九年皇太子辭免
臨安府尹其知通簽推判官並復置

留守

留守周之君陳似其任也此後無聞後漢和帝南巡祠

園廟張禹以太尉兼衛留守晉張方劫惠帝幸長安僕射荀藩等與其遺官在洛陽為留臺承制行事號為東西臺至安帝時劉裕置留臺具百官後魏孝文南伐以太尉元丕廣陵王羽留守京師並加使持節唐太宗貞觀十七年親征遼東置京城留守以房玄齡充蕭瑀為副其後車駕不在京都則置留守以右金吾大將軍為副咸亨二年高宗幸洛陽以雍州長史李晦為西京留守其後車駕發京都則置留守以右金吾大將軍為副

留守太原府亦置尹及少尹以尹為留守少尹為副留守謂之三都留守

宋制天子巡狩親征則命親王或大臣總留守事建隆元年親征澤潞以樞密使吳延祚為東京留守其西南北京留守各一人以知府事兼之

西京河南南京應天北京大名分記留

守司掌宮鑰及京城守衛修葺彈壓之事畿內錢穀兵民之政建炎初京城有副留守

以檢校少傅寧武軍節度使范訥充留守以侍

衛親軍都指揮使遂安軍承宣使郭仲荀副之又有西京留守並係執政從臣

充兼節制軍馬其後武林建業並建行宮武林視汴都
而建業視三都焉紹興四年參知政事孟庚為行宮留
守從權措置百司事務六年有行宮同留守
以左通奉大夫孟庚是年八月三省已降
提舉萬壽觀兼侍讀充詔二留守並權赴尚書省治事
指揮三省樞密院常程事務並聽行宮留守司與決詔秦檜孟庚並權赴尚書省治事

都廂

宋朝大中祥符元年置京新城外八廂真宗以都門之
外居民頗多舊例惟赤縣尉主其事至是特置廂吏命

京府統之天禧五年增置九廂熙寧三年五月詔以京

朝官曾歷通判知縣者四人分治京城四廂

其先差使臣並罷

凡民有鬪訟事輕者得以決遣

從知開封韓維之請

九月詔許留

後使臣一員分左右廂管勾十一月臣僚言逐廂一月

之內斷決事件不多欲止令京朝官二員分領二廂決

斷所

舊來四廂使仍舊存留以簡諸般差使

元祐四年知開封謝景溫請

於新城內外左右置二廂通為四廂四年罷紹聖元年復置紹興中臨安府先依開封例於城外南北廂置主

管公事近又於城內左右廂添置官二員分減在城詞
訟其後臣僚言將在城左右廂廢罷其廂官二員移往
城南北廂紹興二十六年六月侍御史周方崇言臨安府先依開封府例於城外南北廂置主管公
事近又於城內左右廂添置官二員欲令減在城詞訟
本府每日詞訟十有七八並判送二廂逐廂公吏徇情
曲法非理迫人並不係公行遣送下詞訟既多有非廂
官所能行者一切不決州府既不與決兩廂又不行遣
入戶怨嗟緣臨安府與昔日開封府繁簡不同本府長
官置吏不少見今城南北廂官全闕欲乞將在城左右
廂廢罷其廂官二員却移往城北廂所有
城內詞訟令本府依前自行理決從之

郡太守

郡守秦官秦滅諸侯以其地為郡置守丞尉各一人守
治民丞佐之尉典兵漢景帝中元二年更名郡守為太
守凡在郡國皆掌治民進賢勸功決訟檢姦常以春行
所主縣秋冬遣無害吏按訊諸囚平其罪法論課殿最
按律有無害都吏言如公平吏漢書蕭何以文無害為沛主吏掾并舉孝廉漢制歲盡

遣上計掾史各一人條上郡內衆事謂之計偕簿郡為
諸侯王國者置內史以掌太守之任宣帝以為太守吏
民之本數變易則下不安民知其將久不可欺罔乃服

從其教化每拜刺史守相輒親見問觀其所繇退而考

察以質其言

正質

常稱曰與我共治者唯良二千石乎是

以漢世良吏於是為盛稱中興焉

元帝建昭二年益三河大郡太守秩凡戶

十二萬為大郡帝又下制

成帝綏和元年省內史以相

令諸侯王相位在太守下

治民則相職為太守

哀帝初御史大夫王嘉上疏曰公卿以下變易促急數政更政事吏

或居官數月而退送故迎新交錯道路二千石輕賤吏人慢易則有離叛之心前山陽亡徒縱橫吏士臨難莫

肯仗節死義者以守相威權素奪也故成帝悔之詔二

千石不以故縱為罪賜金以厚其意誠以國家有急取

辦於二千石二千石尊重難危乃能使下故尚書章文

必有敢告之字乃下所以丁寧告者之辭今二千石刺

史三輔縣令有材任職者若有過差宜可閹畧令盡力者有所勸此方今急務國家之利也

王莽改

太守曰大尹後漢亦重其任或以尚書令僕射出為郡

鍾離意黃香桓

或自郡守入為三公

虞延第五倫和

三

榮胡廣是也

虞鮑昱是也

國時有郡守國相內史晉郡守皆加將軍無者為耻

王導

永嘉末選丹陽太守加輔國將軍導上牋曰昔魏武達政之主也荀文若功臣之最也封不過亭侯倉舒愛子之寵贈不過別部司馬今者臨郡不問賢愚皆加重號輒有鼓蓋有不得者為耻導饗名竊位取柰彝典謹送鼓蓋加崇之物請從導始帝嘉而從之初泰始中詔守相三載一巡屬縣必以春此古者所以述職省俗宣風展義也又山公啟事曰晉制春夏農月不遷改長吏郡守縣令之屬以其妨農事故也

晉宋守相

內史並銀章青綬進賢兩梁冠後魏初郡置三太守

說在

刺史

孝文初二千石能靜二郡至三郡者遷為刺史

說在

篇

縣令

太和中次職令郡太守內史相縣令並以六年為

篇

限北齊制郡為上中下三等每等又有上中下之差自

上上郡至下下郡凡九等後周郡太守各以戶多少定

品命隋郡太守如北齊九等之制至開皇三年罷天下

諸郡以州統縣

楊尚希上表曰當今郡縣倍多於古十

羊九牧人少官多請存要去間併小為

大帝嘉之

遂罷諸郡大業三年又改州為郡郡置太守唐武德元

年改郡為州改太守為刺史加號持節

總管則加使持節按魏晉制有

使持節持節假節使持節得戡二千石以下持節得戡無官人若軍事得與使持節同假節唯軍事得戡犯令者皆是刺史兼總軍戎若唐採訪節度使也自宋齊以降雖天下分裂其州郡漸衆及隋開皇初有州二百一十郡五百八以官煩人弊遂廢郡便以州親人則刺史如太守之職自後雖官名屢改而職事不易蓋制置之際不詳源本因襲舊名遂有持節諸軍之虛稱其屬官別駕以下錄事功戶諸曹參軍事亦多漢晉之制若唐之節度採訪副使判官之任本置別駕乘一車行部其參軍錄事皆佐戎旅今並無其實豈所謂必也正名者乎又按加刺史持節軍事之名以為榮寵則邊荒萬里三數百戶小郡亦同此號又無以別遠近大小之差輕重間劇之異也顯慶元年都督府及上州後加號為使各置執刀十五人中州下州各置十人

持節諸軍事而實無節但頒銅魚符而已天寶元年改

州為郡刺史為太守

漢文帝二年初與郡守為銅虎符竹使符說在符寶郎篇至隋開皇

七年又別頒青龍符於東方總管刺史西方以駙虞南方朱雀北方元武九年又頒木魚符於總管刺史雌一雄二至十年悉頒木魚符於五品以上官義寧二年罷竹使符頒銀莧符於諸郡唐武德元年又改銀莧符為銅魚符

自是州郡史守更相為名其實一也太宗初理天

下也重親人之任書督守之名於屏俯仰視焉其人善

惡必書其下是以州郡無不率理

貞觀中賈敦實為饒陽令有能名時制大

功以下不得聯職敦實兄敦頤復為瀛州刺史朝廷以其兄弟廉謹許令同州竟不遷替時人榮之逮貞

觀之未升平既久郡士多慕省閣不樂外任其折衝果
敢有材力者先入為中郎郎將次補郡守其輕也如是
武太后臨朝垂拱二年諸州都督刺史宜准京官帶魚
長安四年納言李嶠同平章事唐休璟奏曰竊以物議
重內官而輕外職凡所出守多因貶累非所以澄風俗
安萬人臣請擇才於臺閣省寺之中分典大州其康庶
政臣等請輟近侍率先具寮太后乃令書名採之中者
當行於是鳳閣侍郎韋嗣立御史大夫楊再思等二十

人中之皆以本官檢校刺史

後二十人內以政績可稱者獨常州刺史薛光謙徐

州刺史司馬鍾二人而已

當時復有為員外刺史者

永昌中成王李千里歷遷襄州

員外刺史神龍初以譙王重福之妃張易之甥也貶重福為濮州員外刺史皆不領州務

開元中定

天下州府自京都及都督都護府之外以近畿之州為

四輔

同華岐蒲四州謂之四輔八年都督刺史品卑者借緋魚袋按武德令三萬戶以上為上州永徽令

二萬戶以上為上州顯慶元年九月勅戶滿三萬以上

為上州二萬以上為中州先以為上州中州者仍舊至

開元十八年三月勅太平時久戶口日殷宜以四萬戶

以上為上州二萬五千戶為中州不滿二萬戶為下州

六千戶以上為上縣三千戶以上為中縣不滿三千戶為下縣

其餘為六雄

鄭陝汴絳懷魏六州

為六

十望

宋毫滑許汝晉洛號

十緊

初有十緊州後入

列及上中下之差

凡戶四萬以上為上州二萬五千以

約戶口以別勅為上州者又謂近畿者為畿內州戶雖不滿四萬亦為上州其親王任中下州刺史者亦為上州王去任後即依舊式天寶中通計天下上州一百九中州二十九下州一百八十九總三百二十七州也時南海太守劉巨鱗以贓罪詔杖殺之自至德後州縣凋弊刺史之任大為精選諸州始有兵鎮刺史皆加團練使故其任重矣五代時仍刺史之號後唐時以二十五月為限

宋太祖開基革五季之患召諸鎮會於京師賜第以留之分命朝臣出守列郡號權知軍州事軍謂兵州謂民

政焉其後文武官參為知州軍事二品以上及帶中書
樞密院宣徽使職事稱判太守掌總理郡政宣布條教
導民以善而糾其姦慝歲時勸課農桑旌別孝悌其賦
役錢穀獄訟之事兵民之政皆總焉凡法令條制悉意
孝行以率所屬有赦宥則以時宣讀而頒告於治境舉
行祀典察郡吏德義材能而保任之若疲軟不任事或
姦貪冒法則按劾以聞遇水旱以法賑濟安集流亡無
使失所若河南應天大名府則兼留守司公事太原府

延安府慶州渭州熙州秦州則兼經畧安撫使馬步軍
都總管定州真定府瀛州大名府京兆府則兼安撫使
馬步軍都總管瀘州潭州廣州桂州雄州則兼安撫使
兵馬鈐轄潁昌府青州鄆州許州鄧州則兼安撫使兵
馬巡檢其餘大蕃府或沿邊州郡或當一道衝要者並
兼兵馬鈐轄巡檢都監或帶沿邊安撫提轄兵甲沿邊
溪峒都巡檢餘州軍則否其屬官有無及員數多寡皆
視其地望之高下與職務之繁簡而置之建炎元年詔

河北京東西路除帥臣外舊差文臣知州去處許通差武臣一次後詔要郡帶本路兵馬鈐轄次要郡帶本路兵馬都監紹興三年罷元年七月詔要郡文臣帶本路兵馬鈐轄武臣副之次要郡文臣帶本路兵馬都監武臣副之令逐州改正稱呼至紹興三年臣僚言既與異時沿邊事體不同又於今日諸州統制無補徒著名位以成虛文詔並罷之

五年令郡守除授罷並令上殿

凡從官出知郡者特許不避本貫詔應守臣以三年為任六年詔控扼去處守臣並以三年為任九年罷令郡

守並帝提舉學事

九月禮部言知建昌軍李長民奏宣和以前應知通令佐階銜並帶主管

學事自軍興以來中輟今欲郡縣依舊法給銜從官以上知郡係帶提舉學事餘郡知通縣令佐並帶主管學事給銜

孝宗乾道三年令不任守臣不為郎

中書門下省言勛會

已降指揮非曾任守臣及監司不得除郎官著入條令

淳熙中令郡守罷帶主管

學事

郡尉

京輔屬國等都尉附

郡尉秦官有郡尉掌佐守典武職甲卒漢凡郡口二十萬舉一人典兵禁備盜賊景帝更名曰都尉武帝元鼎四年又置三輔都尉各二人譏出入邊郡置農都尉主

屯田殖穀又置屬國都尉主蠻夷降者中興建武七年

省諸郡尉并職太守無都試之役

漢舊儀曰民年二十三為正一歲以為衛

士一歲為材官騎士習射御馳陣八月太守都尉令長相丞尉會都試課殿最水軍為樓船亦習戰射年五十六老衰乃得免為民就田今乃罷其役焉每有劇賊郡臨時置都尉事訖罷

又省關都尉唯邊郡往往置都尉及屬國都尉

宋志曰光武省

郡尉後往往置東南西北四部都尉

稍有分縣治民比郡安帝以西羌盛

三輔有陵園之守乃復置右扶風都尉於雍京北虎牙

都尉於長安自後無聞至隋煬帝時別置都尉領兵與

郡不相知又置京輔都尉立府於潼關主兵鎮唐無其制

按自秦置三十六郡而郡官有守有尉有丞然考之西漢百官表稱郡守掌治郡秩二千石有丞秩六百石郡尉掌佐守典武職秩比二千石有丞秩亦六百石是守尉皆二千石而俱有丞以佐之尉之尊蓋與守等非丞掾以下可擬也酷吏傳言周陽由為守視都尉如令為都尉陵太守奪之治明

守不可卑視尉也然武帝欲以甯成為郡守公孫

弘言成為濟南都尉其治如狼牧羊不可令治民

又帝拜吾邱壽王為東郡都尉帝以壽王故不復

置太守是時軍旅數發年歲不熟多盜乃賜壽王

璽書曰子在朕前之時知畧輻湊以為天下少雙

及至連十餘城之守任四千石之重

守尉皆二千石壽王兼二

任故云四千石也

職事並廢盜賊縱橫甚不稱前時壽王

謝罪又翟義為南陽都尉行太守事行縣至宛以

事按宛令下之獄威震南陽則知漢時都尉蓋不特典軍而未嘗不行太守之事也魏晉以後無都尉之官然晉郡守皆加將軍之號唐郡守曰使持節諸軍事宋朝則大郡皆兼兵馬總管兵馬鈐轄而小壘亦曰軍州事或帶節制軍馬則秦漢所謂都尉之職歷代以太守兼任之亦以一郡掌兵權之官不可下於太守故不別置官而守就治其事循宰相之兼元樞是也通典敘郡尉而以置之郡

佐之末非是故今以次郡守

郡丞別駕

長史

司馬

通判

秦置郡丞以佐守在邊為長史掌兵馬漢因之于定國
條州大小為設吏員治中別駕諸郡從事秩六百石晉
因之而省郡丞唯丹陽不省宋梁以下復置至隋改別
駕治中為長史司馬蓋隋以州為郡無復軍府則州府
之職參為郡官故有長史司馬煬帝罷之而置通守又
置郡贊治後又改為丞位在通守下至唐而郡丞廢矣

武德元年改丞為別駕十年改雍州別駕曰長史高宗

即位改別駕皆為長史別駕以皇族為之開元始通用

庶姓以貳都督刺史之職天寶八載諸郡始廢別駕玄

宗由潞州別駕入定內難登大位乃廢別駕下郡置長

史一員上元二年諸郡始置別駕

別駕一人從四品百官志

德宗時

復省元和長慶之際兩河用兵裨將有功者稱東宮王

府官久次當進及受代於京師者常數十人訴宰相以

求官文宗詔宰相韋處厚建議復置兩輔六雄十望十

緊州別駕

宋藝祖懲五代藩鎮之弊乾德初下湖南始置諸州通

判命刑部郎中賈玘等充建隆四年詔知府公事並須

長史通判簽議連書方許行下時大郡置兩員

西京南京天雄

成德益杭并晉荆南潭廣秦定等州

餘置一員州不及萬戶不置廣南小

州有試秩充通判兼知州者正刺史以上及諸司使副

知州者雖小郡亦特置

天聖三年中書門下言新授號州團練使田敏知隰州自來防

團刺史赴本任及知州無同判處權置同判候差朝臣及內職知州即行省罷

掌倅貳郡政與

長史均禮凡兵民錢穀戶口賦役獄訟聽斷之事可否

裁決與守通簽所部官有善否及職事修廢得刺舉以

間至景德宋興三十四年戶口寢息解州以滿萬戶置

通判自是諸郡多滿萬戶矣宣和二年詔諸州茶鹽香

礬並委通判

此事據續會要但通判掌常平水利免役等錢續會要既不載而中興以後通判掌

經制總制錢會要亦不載當考

建炎初諸州通判二員減一員紹興五

年以後旋行申請添置帥府通判並以兩員為額

司馬本主武之官自魏晉以後刺史多帶將軍開府者

則置府寮司馬為軍府之官理軍事

晉謝奕字無奕桓溫辟為安西司馬

在溫座岸幘嘯詠如常溫曰我方外司馬也

宋制司馬銅印墨綬絳朝服武

冠至隋廢州府之任無復司馬而有治中焉治中舊州

職也

舊謂隋以前

州廢遂為郡官

說在州佐後治中篇

開皇三年政治

中為司馬

隋房恭懿為澤州司馬有異績遷德州司馬理為天下之最文帝曰此乃上天社稷之所

祐豈朕寡薄能致之乎遷海州刺史

煬帝又改司馬及長史併置贊治一

人尋又改贊治為郡丞唐武德初復為治中貞觀二十

三年高宗即位遂改諸州治中並為司馬

長安元年洛雍并割揚益

六州置左右司馬各一員四年復舊太極元年又置四大都督府置左右司馬各一員所職與長

史同

白居易江州司馬廳記自武德以來庶官以便宜制事大攝小重侵輕郡守之職總於諸侯帥郡佐之職移於部從事故自五大都督府至於上中下郡司馬之事盡去惟員與俸在凡内外文武官左遷右移者遽居之凡執役事上與給事於省寺軍府者遙署之凡仕久資高耄昏懦弱不任事而時

不忍棄者實泣之泣之者進不課其能退不殿其
不能才不才一也若有人蓄器貯用急於兼濟者
居之雖一日不樂若有養志忘名安於獨善者處
之雖終身無悶官不官係乎時也適不適在乎人
也江州左匡廬右江湖土高氣清富有佳境刺史
守土臣不可遠觀遊羣吏執事官不敢自暇佚惟
司馬綽綽可從容於山水詩酒間由是郡南樓山
北樓水滢亭百花亭風篁石巖瀑布廬宮源潭洞

東西二林寺泉石松雪司馬盡有之矣苟有志於
吏隱者捨此官何求焉按唐六典上州司馬秩五
品歲廩數百石月俸六七萬官足以亢身食足以
給家州民康非司馬功郡政壞非司馬罪無言責
無事憂噫為國謀則尸素之尤蠹者為身謀則祿
仕之優穩者予佐是郡行四年矣其心休休如一
日二日何哉識時知命而已又安知後之司馬不
有與吾同志者乎因書所得以告來者

按漢所置郡佐只丞及長史而已其後又有治中別駕至魏晉間始有司馬本主武之官自後長史司馬與治中別駕迭為廢復然歷代皆並設二員至唐而司馬多以處遷謫蓋視為冗員故宋只設通判一官佐郡守不仍前代之舊云

容齋洪氏隨筆曰今世士大夫既貴不可復賤淳化中北戎入寇以殿前都虞候曹璨知定州時趙安易官宗正少卿已知州遂就徙通判同時有羅

延吉者既知彭祁絳三州而除通判廣州滕中正
知興元府而通判河南袁郭知楚鄆二州會秦王
廷美遷置房州詔崇儀副使閻彥進知州而以郭
通判州事范正辭既知戎淄二州而通判棣深又
陳若拙歷知單州殿中侍御史西川轉運使召歸
會李至守洛乃表為通判久之柴禹錫鎮涇州復
表為通判連下遷而皆非貶降近不復有矣

按藝祖之設通判本欲懲五季藩鎮專擅之弊而

以儒臣臨制之號稱監州蓋其官雖郡佐而其入
間有出於朝廷之特命不以官資之崇庠論如野
處所言是也其與後來之汎汎以半刺稱者不侔
矣

教授

漢郡國有文學文翁治蜀起學成都市招下縣子弟以
為學官弟子武帝時天下郡國皆立學校官自文翁為
之始云平帝時郡國曰學縣道邑侯國曰校校學置經

師一人鄉曰庠聚曰序序庠置孝經師一人魏晉以下

郡國並有文學即博士助教之任

唐六典

隋潘徽為州博

士唐府郡置經學士各一人掌以五經教授開元二十

六年敕州縣每鄉之內各置一學仍擇師資令其教授

宋初有四書院廬山白鹿洞

太平興國二年知江州周述言廬山白鹿洞學徒常

數十百人望賜九

嵩陽書院

至道二年賜額及印本九經

嶽麓書院

經詔乃從其請

咸平四年鄆州守臣李允則奏嶽麓山書院修廣舍宇有書生六十餘人聽誦乞下國子監降釋文等書詔從

之應天府書院

祥符二年新建書院詔以曹誠為助教國初有戚同文者通五經業高尚不仕

聚徒教授常百餘人許讓郭承範董循陳興王礪滕涉
皆其門人同文卒後無能繼其業者至是始有是命并
賜院額此四書院之
外又有茅山書院未建州學也乾興元年兗州守臣

孫奭私建學舍聚生徒乞請太學助教楊光輔充本州
講從之餘鎮未置學也景祐四年詔藩鎮始立學他州
勿聽也寶元元年潁州守臣蔡齊請立學時大郡始有

學而小郡猶未置也

自明道景祐間累詔州郡立學賜田給事學校相繼而興近制惟藩

鎮立學類為支郡齊以為言而特許之

慶歷四年詔諸路州軍監各令立

學學者二百人以上許更置縣學於是州郡不置學者

鮮矣又置教授以三年為一任以經術行義訓導諸生
掌其課試之事而糾正不如規者委運司及長史於幕
職州縣官內薦教授或本處舉人舉有德藝者充當時
雖置教授或用兼官或舉士人委於漕司而未隸朝廷
也熙寧六年詔諸路學官並委中書門下選差至是教
授始命於朝廷矣元豐元年州府學官共五十三員諸
路唯太郡有之軍監蓋未盡有也元祐元年詔齊廬宿
常等州各置教授一員自是以後列郡多有教官矣建

炎三年教授並罷紹興三年復置四十二州十二年詔
興教授官州軍令吏部申尚書省選差十三年詔諸州
軍並各置教授其禮部長貳正係所隸合依崇寧大觀
格法許按劾體量及歲舉改官從司業高閱之請也二
十六年詔並不許兼他職令提舉司掌切遵守從知郢
州路採訪使之請也若試教官則始於元豐元豐七年
官上等為博士下等為正錄願授教授者聽中丞胡宗
愈言學者初登科遂願師席非是詔內外學官經任年
至三十方得在選又有薦舉學官法紹聖初乃令中制
科及進士第在上五人禮部奏名在上三人府監廣文

館第一人或從太學上舍得第即不試而用元符元年詔學官歲一試紹興五年罷試學官科十五年詔試諸州教授自添差教授則始於政和政和三年詔公行來春始

朱子漳州教授廳壁記教授之為職其可謂難矣惟自任重而不苟者知之其以為易而無難者則苟道也何也曰教授者以天子之命教其邦人凡邦之士廩食縣官而充弟子員者多至五六百餘少不下百十數皆惟教授者是師其必有以率厲化服之使躬問學蹈繩槩出入不悖所聞然後為

稱此非反之身而何以哉是可不為難矣哉不特
此爾又當嚴先聖先師之典祀領護廟學而守其
圖書服器之藏其體至重下至金穀出內之纖悉
亦皆獨任之嗚呼是亦難矣然凡仕於今者無大
小莫不有所臨制統攝其任無劇易必皆具文書
使可覆視是以雖甚弛者亦有所難而不敢肆獨
教授官雖有統若其任之本諸身者則非簿書期
會之所能察至其具於有司而可考者上之人又

以其儒官優容之雖有不合不問以是為便故今
之仕者反利焉而喜為之而孰知所以充其任者
如彼其難哉故曰惟自任重而不苟者知之其以
為易而無難者則苟道也

錄事參軍

司功

司倉

司兵

司士等參軍

參軍事

經學博士

醫學博士

中

正

通守

五官掾

督郵

司理

司法

司戶

後漢有郡主簿官在漢魏間及江左為督郵主簿

皆太守自

辟除晉置本為公府官非州郡職也掌總錄衆曹
文簿舉彈善惡後代刺史有軍而開府者並置之

後魏

洎隋皆有錄事參軍

及罷郡以州統縣
皆吏部選除之

煬帝置郡有東

西曹掾及主簿唐武德復為錄事參軍開元改司錄參

軍掌正違失涖符印後唐應順間州置錄事參軍

三考者主

劇縣以上定
格滯壅故也

宋朝沿唐制州有錄事參軍然不盡置也諸府為司錄

諸州為錄事乾興元年丁度申請諸州始各置錄事參

軍慶歷二年河西河東陝西諸州權令京官知錄事參

軍熙寧三年詔繁難去處錄事參軍並差職官知縣及

奏舉縣令人充政和三年尚書省言州建六曹參軍參
軍之稱起於行軍之際恐不當襲錄事參軍欲改為司
錄奉聖旨參軍改為掾建炎初復舊名錄事掌州縣庶
務糾諸曹稽違乾道中汪大猷申請依司理例不兼他
職從之

司功參軍兩漢有功曹史主選署功勞

後漢范滂字孟博汝南太守宗

資請為功曹委任政事拙拔幽陋不軌者皆掃迹謠曰
汝南太守范孟博南陽宗資主畫諾又岑暄字公孝南
陽太守成瑨請為功曹謠曰南陽太守岑公孝弘農成
瑨但坐嘯又許劭字子將為郡功曹府中聞子將為吏

莫不改
操歸行

歷代皆同北齊諸州有功曹參軍隋亦然及罷

郡置州以曹為名者改曰司煬帝罷州置郡改曰司功
書佐唐改曰司功參軍開元初京尹屬官及諸都督府
並曰功曹參軍而列郡則曰司功參軍令掌官員祭祀
禮樂學校選舉表疏醫筮考課喪葬之事

司倉參軍兩漢有倉曹史主倉庫北齊以下並同功曹
唐亦掌倉廩庖厨財物廛市之事

司兵參軍漢司隸屬官有兵曹從事史蓋有軍事則置

之以主兵事至北齊以後並同功曹唐掌軍防烽驛傳
送馬門禁田獵儀仗之事

司士參軍兩漢無聞北齊以後與功曹同唐掌管河津
營造橋梁解宇之事

參軍事後漢靈帝時陶謙以幽州刺史參司空車騎張
溫軍事晉時軍府乃置為官員

中軍羊祜置參軍二人
太尉楊滂置參軍六人

歷代皆有至隋為郡官謂之書佐唐改為參軍掌直侍
督守無常職有事則出使

前代又有行參軍者晉河間
王頤以太宰輔政始置之掌

使命歷代皆有唐惟王府有之餘則無矣

經學博士漢郡國皆有文學掾

漢鄭崇為郡文學後漢光武問功臣曰諸卿不

遭際會自度爵祿何所至乎鄧

禹曰臣少嘗學問可郡文學

歷代多闕

隋潘徽為州博士

唐

府郡置經學博士各一人掌以五經教授學生多寒門

鄙儒為之

助教學生各有差

醫博士一人唐開元十一年七月制置階品同錄事每

州寫本草百一集驗方與經史同貯其年九月御撰廣

濟方五卷頒天下貞元十二年二月御撰廣利方五卷

頒天下自今以後諸州府應闕醫博士宜令長史各自訪求選試取人藝業優長堪效用者具以名聞已出身人及前資官便與正授其未出身且令權知四考後州司奏與正授餘准恒式吏部更不須選集

中正魏置

中正之始已具州中正篇

晉諸中正率一國所推臺閣取

信後魏孝明正光元年罷諸郡中正北齊郡縣皆有之他史多闕隋初有後罷而有州都唐並無此官每歲貢士符書所關及鄉飲酒之禮則司功參軍主其事

通守隋煬帝置每郡各一人位次太守而京兆河南謂之內史今無

五官掾後漢有之署功曹及諸曹事今無

督郵漢有之掌監屬縣有東西南北中部謂之五郡督

郵也故督郵功曹之極位

漢尹翁歸為東河督郵時太守田延年分河東二十八縣

為兩部閔孺部分北翁歸部分南舉法皆得其罪屬縣長吏雖中傷莫有怨者

右司功參軍司倉司兵司士中正五官掾督郵七

職宋無

司理五代以來諸州皆有馬步獄以牙校充馬步都虞候掌刑法謂之馬步院

宋太祖慮其任私高下其手開寶六年始置諸州司寇參軍以新進士及選人為之後改為司理掌獄訟勘鞫之事不兼他職元祐定令上州從八品中下州九品

司法兩漢有決曹賊曹掾主刑法歷代皆有或謂之賊曹法曹墨

曹隋唐更革與司戶同唐掌律令定罪盜賊贓贖之事

宋沿唐制諸州置司法參軍掌議法斷刑品同司戶紹興三

年權行減罷後復舊

司戶漢魏以下有戶曹掾主民戶北齊以下與功曹同

隋有戶曹參軍文帝時為司戶參軍煬帝為司戶書佐

唐開元復為戶曹參軍掌戶口籍帳婚姻田宅雜徭道

路之事

在府為曹
在州為司

梁開平省六曹掾屬留戶曹一員通

判六曹

宋朝沿唐制諸州置司戶參軍掌戶籍賦稅倉庫交納
元祐令中州從八品下州從九品乾道六年注大猷乞

令司戶專差主倉庫

縣令

周官有縣正

四百里為縣

各掌其縣之政令而賞罰之春秋

時列國相滅多以其地為縣則縣大而郡小故傳云上

大夫受縣下大夫受郡

周書作維篇曰千里百縣縣有四郡

縣邑之長曰

宰曰尹曰公曰大夫

晉謂大夫魯衛謂之宰楚謂之公尹

其職一也

孔子為中

都宰一年四方皆則之由中都宰為司空

至於戰國則郡大而縣小矣故甘

茂謂秦武王曰宜陽大縣名曰縣其實郡也漢制列侯

所食縣曰國皇太后公主所食曰邑有蠻夷曰道凡縣萬戶以上為令減萬戶為長侯國為相秩次亦如之皆秦制也漢因之

漢書曰凡縣大率方百里民稠則減稀則曠

成帝綏和元年

長相墨綬哀帝建平二年復黃綬秋冬集課上計於所

屬郡國

胡廣云秋冬歲盡各計縣戶口墾田錢穀入出盜賊多少上集簿丞尉以下歲詣郡課校其功

功多尤為最者於庭慰勞勉之以勸其後負多尤為殿者於後曹對責以糾怠慢也又漢官曰明帝臨觀見洛陽令車騎意河南尹及至而非尤其泰盛勅去軒綬時偃師長治有能以事詣臺因取賜之下縣遂以為故事

其郡有鹽官鐵官工官都水官者隨事廣狹置令長

及丞秩序皆如縣道無分土給均吏

後漢凡郡縣出鹽多者置鹽官主鹽

稅出鐵多者置鐵官主鼓鑄有工多者置工官主稅物有水池及漁利多者置水官主平水收漁稅所在諸縣

均差吏更給之署

吏隨事不具縣員

晉制大縣令有治績官報以大郡

山公

啟事曰溫令許奇等並見能名雖在職各日淺宜顯報大郡以勸天下詔曰按其資歷悉自足為郡守各以在職日淺則宜盡其政績不宜速他轉也

不經宰縣不得入為臺郎宋諸縣

署令銅印墨綬進賢兩梁冠自晉宋以後令長國相皆

如漢制後魏縣置三令長

說在刺史篇

孝文初制縣令能靜

一縣劫盜者兼理二縣即食其祿能靜二縣者兼理三

縣三年遷為郡守二千石能靜二郡者兼理至三郡亦

如之三年遷為刺史太和中次職令其祿甚厚

後魏孝文以北

平府長史裴聿中書侍郎崔亮並清貧欲以俸祿優之乃以亮帶野王令聿帶溫縣令時人榮之

其後

令長用人益雜但選勤舊令史為之而縉紳之流耻居

其位北齊制縣為上中下三等每等又有上中下之差

自上上縣至下下縣凡九等然猶因循後魏用人濫雜

至於士流耻居之元文遙遂奏於武成帝請革之乃密

令搜揚世胄子弟恐其辭訴總召集神武門宣旨慰諭

而遣自此縣令始以士人為之隋縣有令有長煬帝以

大興長安河南洛陽四縣令並增正五品諸縣皆以所

管閒劇及衝要之處以為等級唐縣有赤

三府共
有六縣

畿

十八

二望

七十

緊

百一

上

四百四

中

二百九

下

五百五

七等

之差

京都所治為赤縣京之旁邑為畿縣其餘則以戶口多少資地美惡為差

凡一千五百

七十三縣令各一人五代任官凡齷齪無能者始注為

縣令

故天下之邑率皆不治甚
者誅求刻剝猥瑣萬狀

宋朝建隆元年應天下諸縣除赤畿外有望緊上中下

四千戶為望三千戶以上為緊二千戶以上為上千
戶以上為中不滿千戶為中下五百戶以下為下也掌
總治民政勸課農桑凡戶口賦役錢穀賑濟給納之事
皆掌之有孝悌行義聞於鄉閭者申州激勸以勵風俗
有戎兵則兼兵馬都監或監押三年始以朝臣為知縣
其間復參用京官或幕職為之朝臣知縣自大理正奚
嶼監察御史王祐等始
天聖間天下多缺官而令選尤猥下貪庸耄懦為清流
所不與而久不得調乃為縣令人數言其病民乃詔為
舉法以重令選凡知州轉運使歲舉見任判司簿尉有

罪非贓私有出身三考無出身四考堪為令者一人或
二人自是人重為令令選稍精慶歷間詔天下知縣非

鞫獄毋得差政和二年詔縣令以十二事勸課農桑宜

各遵行上副朝廷

一曰敦本業二曰興地利三曰戒游

蓄積七曰備水旱八曰戒宰牛九曰置農器
十曰廣栽植十一曰恤苗戶十二曰無妄訟自政和以

來太平盛時人皆重內輕外士大夫皆輕縣令之選吏

部兩選不注者甚多然後議所以增重激勸之法宣和

五年縣令止差六十以下人

從利運判王敏之之請也

靖康初詔初

改官必為縣

七月詔三省申明舊制今後不以堂除吏部人凡初改官未曾實歷知縣者不許別

除差遣

紹興七年詔將寺監丞簿等任滿已改官人未歷

民事者各與堂除知縣一次並借緋章服九年詔吏部

自後縣令差文臣

臣僚奏建炎以來始注武臣為害甚衆故也

乾道元年詔

京官知縣以二年為任雖屢有更革卒以三年為任

二年

詔吏部依四川專法施行以三十箇月為任從吏部陳之茂請三年詔依舊以三年為任九年復以二年為任從吏部李彥穎請淳熙三年復以三年為任從王師愈之請也

二年御筆今後非兩任

縣令不除監察御史初改官人必作令謂之須人紹興

初數申嚴之後或廢孝宗在位持之甚嚴慶元初復詔除殿試上三名省元外並作邑五年又令試大理評事官已改官未歷縣人並親民一次著為令舊捕盜改官人並試邑自後雖宰相子殿試科甲人無不宰邑者矣

縣丞

主簿

縣尉

漢氏縣丞尉多以本部人為之三輔縣則兼用他郡諸縣皆有主刑獄囚徒後漢署文書典知倉獄署諸曹掾吏凡諸縣署丞皆銅印黃綬進賢一梁冠自晉後無丞

宋惟建康有獄丞及夫隋氏革選盡用他郡人漢已下皆用一人唐置京縣丞三員北京太原晉陽各置一人高宗始為品官吏部選授為縣令之貳

宋初不置丞天聖中因蘇耆請開封兩縣始各置丞一

員在簿尉之上仍於有出身幕職令錄內選充

時兩赤縣簿尉

多差出外本縣闕官故者有此請

皇祐中詔赤縣丞並除新政官人熙

寧四年編修條例所言諸路州軍繁劇縣令戶二萬已上增置縣丞一員以幕職官或縣令人充元祐元年詔

應因給納常平免役置丞並行省罷如委是事務繁劇
難以省罷處令轉運司存留崇寧二年宰臣蔡京言熙
寧之初修水土之政行市易之法興山澤之利皆王政
之大請縣並置丞一員以掌其事

國史外補云縣丞昔大邑有之至是不以

邑之大小皆得置丞使主管常平坑冶農田水利

大觀三年詔昨增置縣丞內

除舊額及萬戶以上縣令委是事務繁冗并雖非萬戶
實有山澤坑冶之利可以興修去處依舊存留外餘皆
減罷建炎元年詔縣丞係嘉祐以前員闕并萬戶處存

留一員餘並罷紹興三年以淮東累經兵火權罷縣丞
十八年置海陵丞一員嘉定後小邑不置丞以簿兼
主簿漢晉有之自漢以來皆令長自調用至於隋始置
之唐主簿上轄赤縣置二人他縣一人武德初以流外
為之高宗始以為品官吏部選授掌付事勾稽省署抄
目糾正縣內非違

宋朝開寶三年詔諸縣千戶以上置令簿尉四百戶以
上置令尉今知主簿事四百戶以下置簿尉主簿兼知

縣事咸平四年王欽若言川峽縣五千戶以上請並置簿自餘仍舊以尉兼從之天禧五年劔州梓潼等各增主簿皇祐五年詔南川縣置主簿嘉祐五年婺州義烏永康武義浦江四縣置主簿熙寧四年陝西河東沿邊城寨置主簿

縣尉漢大縣兩尉小縣一人

漢官儀後漢百官志

長安有四尉分

為左右部城東南置廣部尉是為左部城西北置明部尉是為右部並四百石黃綬大冠主追捕盜賊同察姦

非魏因之晉洛陽建康皆置左部尉宋齊梁陳並因之
餘縣如漢制諸縣道尉銅印黃綬朝服武冠北齊郡縣
置三尉隋改為正後置尉又分為戶曹法曹唐初因隋
制武德元年萬年縣法曹孫伏加論事是也武德中復改為正七年復為尉

赤縣置六員他縣各有差分判諸司事高宗時為品官
吏部選授五代久廢而盜賊鬪競則屬鎮將

宋朝建隆三年始每縣復置尉一員在主簿之下奉賜
與主簿同其鎮將只許勾當鎮下煙火爭競公事至和

二年開封祥符兩縣增置一員元豐五年詔重立法地
縣尉並差使臣元祐元年蘇轍言舊法縣尉皆用選人
近歲並用武臣自改法已來未聞盜賊為之衰息請復
舊法詔除沿邊縣尉依舊外餘並差選人崇寧元年詔
重立法地縣尉舊差武臣處並依元豐法

按後之稱縣佐曰丞簿尉然而漢書百官志所載
只丞尉而已簿雖起於漢而志無之又丞尉雖皆
縣佐而各有印綬簿獨無蓋古者官府皆有主簿

一官上自三公及御史府下至九寺五監以至州郡縣皆有之所職者簿書蓋曹掾之流耳漢人所謂高士不為者御史府之主簿也容齋隨筆言元豐令文寺監主簿專以鈎考簿書為職不得與卿丞聯署文書然則主簿之官雖在雄要之司猶為卑賤而況縣乎後漢繆彤為縣主簿縣令被章見考吏皆畏懼自誣而彤獨證其枉考掠苦毒換五獄閱四年令卒自免又寧陽縣主簿詣闕訴其縣

令之枉積七八歲不省虞詡言主簿所訟乃君父之怨百上不達是有司之過仇覽為蒲亭長考城令王渙聞其以德化人署為主簿以是觀之則主簿之在漢其視縣令猶掾史之視使長安得與丞尉等後來以簿先於尉非古義也

鎮戍關市官

隋鎮置將副戍置主副關市置令丞唐因之各有上中


下三等

關令古官戍主晉宋之顯職鎮將後周之通班今以其卑賤與隋制同故舉隋而已

宋制諸鎮監官掌巡邏盜竊及火禁之事兼征税權
則掌其出納會計鎮寨凡杖罪以上並解本縣餘聽決
遣



文獻通考卷六十三



總校官庶吉士臣張能照

校對官檢討臣郭寅

謄錄監生臣藍嘉瑄